

四庫全書

集部

欽定四庫全書

集部  
浮山集卷八至十

詳校官庶吉士臣柳邁祖

主事臣呂雲棟覆勘

謄錄監生臣黃綸

欽定四庫全書

浮山集卷八

宋仲并撰

啟

上宰相陳情啟

較錙銖於溝壑幾墜餘生瞻咫尺之雲霄仰祈再造恃  
公聽之在上持私悃而有陳飢寒之憂勢不得已進退  
之義懷豈無慙伏念某生而蠢愚熟於憂患詩書少日  
何知師友之淵源翰墨窮年空羨文章之光艷望外叨

塵於末第生平顛躓於窮途循分苟安聊復擊為貧之  
析指心自誓不敢執求富之鞭猥蒙交薦之書早冒對  
揚之寵褒踰華袞獲親奉於玉音業授青衿歸游更於  
瑄律重溫舊學益勵壯心一歲九遷敢希異數中年再  
召遽困煩言却掃杜門壺後跋前之未免浮家泛宅攜  
幼扶老以何之塵埃踪跡之已深霜雪鬢顏之如許食  
歎居閒而不足力嗟就列以無能重以萋菲之言萃此  
萍蓬之跡折腰為米亦數免而稀遷捩手覆羹况多仇

而寡與歲月飈忽身世陸沉甚矣無楊子之一屢蕭然  
立相如之四壁每自嗟艱難險阻敢復興念其他然凡  
有血氣心知誰忍無食而死彊顏謀祿踵戶扣人殆費  
營度之百方真可胡盧而一笑茲乘別駕偶在陪都虎  
踞龍蟠極東南之勝槩麟符魚鑰多左右之侍臣雖云  
材具之尋常願贊郡條之萬一實倒指而望歲亦矯首  
而問天坐閱三秋去無幾日會有擇材之請靡容尸祿  
其間尚賴庇存猶未汰斥考龜卜筮方其涓吉而行秣

馬膏車乃復望崖而返戍期尚隔未聞舊令尹之告新  
官稱猶存恍覺今將軍之如故稟生自薄造物何心瀝  
懇大鈞興衰末路恭惟某官精忠許國英識自天業履  
氷霜聳一時之標準篇章黼黻接三代之源流炳先見  
著龜之明鍾信美江山之秀密勿天墀而謀猷屢告雍  
容澤國而威愛並行玉振金聲素擅膠庠之譽山庭淵  
角夙推廊廟之姿羣枉不容孤高自立捫參歷井豈應  
蜀道之行曳履鳴珂端列禁塗之邃進司銓院密侍經

惟洵膺制綍之頒入總政機之重調元鼎鉉合德冕旒  
以魯國之真儒權衡斯道位姬旦之冢宰柱石本朝心  
侔天地之公政復祖宗之舊處至繁而聲色不動屹然  
社稷之宗臣應多變而籌策無遺偉矣旂常之懿績副  
聖主非常之眷為邦家莫大之休福祿來臻苗裔深遠  
重念某之久困世亦少倫雖碌碌稠衆人之中而了無  
一長然歷歷三十年之間而僅書四考憂令病劇力與  
年衰方清朝推從欲之仁而我公廣包荒之度適逢今

日是告危哀俯念匏繫一紀之餘重隔瓜時再期之遠  
翳桑之下視蔭幾何且歲方有秋已朝不謀夕一日復  
一日糟糠之飽未獲焉明年又明年餽廩雖優無及矣  
尚祈不貲之厚賜拯此未盡之餘齡愛尺寸之膚忍自  
卑於桐梓得斗升之水猶有望於桑榆誓守官箴仰酬  
化筆

上宰相啟

有幾餘生分沈淪於溝壑無邊洪造丐潤澤於雲霄念



孤踪未熟於門闌顧平日阻修於簡牘茲忘犯分庶遂  
陳情伏念某淮海飄零江湖僑寓燈火徒苦泥糲拍於  
古人翰墨非長較雕篆於童子莫望四科於闕里偶塵  
一第於漢廷帶經荷鋤經未明而釋荷鋤之苦為親負  
米親不留而乖負米之心早被命於公車獲對揚於便  
殿蒙玉音之一字榮耀終身脫銓調之七階叨踰賤分  
退處泮宮之舊旋參幕府之游一歲九遷敢希異寵中  
年再召遽困煩言訟愆環堵之中絕意璫霄之上佐麾

符於近地有慚別乘之功奉香火於真祠聊借散人之  
號念陳力就列不能者止唯投閒置散乃分之宜旁觀  
或下石焉孤踪如摧朽耳歸尋舊學加勵壯心身雖滯  
於窮途時難逢於休運風雲際會元首明而股肱良哉  
乾坤清寧福祿臻而宗社安矣自念立相如之四壁初  
未有揚雄之一廛聚族猥多不能供億逢辰既泰忍獨  
飄零茲乘別駕偶在陪都虎踞龍蟠極東西之重望麟  
符魚鑰皆左右之侍臣誓竭萬分坐閱三載今欲擇材

而去不容備數其間尚賴并容未從擯斥姑令沙汰之  
在後亦如鴛鴦之不前方既襍被而趨乃復自崖而返  
代期復隔姑存於舊令尹新令尹之間官稱尚存自覺  
有今將軍故將軍之異稟賦自薄造化非私方萬物各  
樂其生某也有此生而獨苦無一夫不得其所某也求  
其所而未安雖冥心九死之餘亦企踵再生之賜恭惟  
某官力扶宗社心契乾坤負剛毅敢為之氣而守以至  
謙積精深自得之學而持之無倦謂可以止則止可以

仕則仕當無墜夫先聖之風念置諸安則安置諸危則危常自任以天下為重提衡正道推轂寒生心醉六經文尤瞻蔚家藏萬卷手自校讎獨看松栢之後凋咸尊星鳳之先睹迺繇人望自結主知烏府抗章議論悉關於國體金華勸講敷陳允契於上心烈日秋霜威名共仰泰山北斗德望愈尊亟奉白麻進登黃閣行平時潔靜精微之學成今日彌縫輔贊之功亮采惠疇妙贊勲華之治守文應變兼收姚宋之長凡茲海宇之心咸謂

朝廷之慶重念某生而多難世亦少倫雖俯仰稠衆人  
之中而了無一長然首尾三十載之間而僅書四考啼  
號盡室轉徙他鄉今歲方有秋已朝不及夕一日復一  
日糟糠之飽未獲焉明年又明年餽廩之憂無及矣尚  
祈大賜拯此餘齡敬惟三吐哺三握髮之勤豈惜一舉  
手一投足之力仰萬間之廣廈何所不容託一枝於深  
林自今以始

上宰執啟

名汚丹筆負黃閣之陶鎔官寄赤城奉紫虛之香火索  
太倉而是懼立四壁以如初漸邇崇墉盡紆危惴伏念  
某了無足取非不自量明堂登杞梓之材樗散何用清  
廟薦珪璋之器珉賤奚宜自垂童子之髻即擁門人之  
簪聞某所有賢者越百舍往從之不知歲律之屢遷自  
恨天資之極陋進身闕里空遐想於四科射策漢廷偶  
未塵於一第釋耒農畝整冠仕塗時乎為貧豈憚擊柝  
抱關之冗親猶未老少資啜菽飲水之歡蒙天幸於化

鈞承人乏於黌宇徒守聖賢之糟粕偶逃簿尉於塵埃  
歸卧萼鄉旋參蓮幕龍蟠虎踞挹王氣於行都玉振金  
聲想餘風於故里無何命薄所至途窮訴平日之險艱  
累千言而莫盡嗟此身之蹭蹬半百歲以無多憶昨捫  
衣首初望履憂餘引分誰推轂於寒蹤望外承恩猥題  
輿於近郡覽紅蓼白萍之勝概尋浮家泛宅之舊游嚮  
日維勤幸去天之咫尺戴星敢憚助守土之毫分嘗聞  
攝刺史之符唯欽奉聖朝之詔一書生綿力何有兩馮

君餘愛具存廩粟帑金謹隄防於蟻漏簞令笞法絕煇  
煉於鼠穿深懲刻木之姦一仰伐柯之則弗鞭其後良  
愧於初擢髮何言噬臍永嘆百里之行九十末路奚堪  
五刑之屬三千隆恩莫報曲從輕比并逭深文至于寬  
餬口之憂當枵腹枯腸之日獲息肩之便於折肱垂翼  
之餘極知負道德之初心稍已還神明之舊觀高天厚  
地殆跼蹐而罔容凌雨震風益帡幪之是賴恭惟某官  
力扶宗社心契乾坤罄辰告之嘉猷毗日躋之聖德罔



冠句屨儒推闕里之真赤舄朱衣才擅周公之美以廣  
厦萬間庇寒士以千金一壺濟中流君將有為天寔大  
任定廟算於都兪之頃靜邊塵於談笑之中贊贊巖廊  
炳堯舜文王之正道雍雍寰宇藹唐虞成周之泰和本  
一言可以興邦迺百樂生於治國旂常所紀簡冊未聞  
誓帶礪於山河有國有家之共慶襲箕裘於弓冶若子  
若孫之相承重念某託命三槐脫身叢棘顛連萬態如  
前語之所云遮護千方恃我公而獲免攜數口窮簷之

下馳一心台座之傍明哉元首而良哉股肱親逢聖旦  
暴之秋陽而濯之江漢阻侍師門自憐塵念之已灰獨  
愴前愆之未雪欲殫陳于一二懼取瀆於再三踴躍自  
鳴不如改過羈栖衆棄惟自省躬畫餅豈足以充飢吹  
虀不忘於懲沸飢寒併日疾痛呼天儻此生氛翳之既  
除即極目青霄之在望遯遠鷓鴣之列夢想鳴珂暫遲  
麋鹿之羣食間炊玉冀載色載笑而匪怒庶三熏三沐  
而少安菲葑不遺桑榆有自日者已竊無功之祿心乎

猶耻有道之貧誓飭微軀永依洪造再辱是懼無尺寸之膚不愛焉初願非他得斗升之水斯活矣陳情冒犯俟命戰兢

上湖州王侍郎啟

巖壑雖遙幸聞風之有日雲霄在望悵披霧之無期誰云開府之初即遂登門之便某學慙畫鵠技止雕蟲久諳世味於苦辛徧歷客途之險阻扶老携幼於干戈之際粵自垂髫跼前童後於憂患之塗逮今華髮謂一行

而作吏庶三釜之及親蠶則績而蟹有筐韋初偶爾木  
欲靜而風不止禍則隨之藐草野之餘生荷槐庭之再  
造寘之別駕仍在名藩彊麋鹿之冠巾雅知非稱雜簿  
書於魚鳥聊樂餘閒駭煩言之驟興凜危踪之何恃吹  
毛法寺方指摘於錙銖瀝血化鈞如照臨於咫尺一飲  
一啄三沐三薰歎糞墻朽木之何誅仰厚地隆天之莫  
報奉香火者兩歲飽藜藿於一家懲羹吹虀每念前愆  
之洗廢食因噎忍令素志之虧雖噬臍之何追每指心

而自誓前言往行願多識之遺俗故家不忘仰止何期  
今日自慰平生恭惟某官萬事蒼龜本朝麟鳳發六經  
之蘊粲然華國之文膺九陞之知凜若鎮時之望羽儀  
要路冠冕郡公流風餘韻則真王謝家省事親心而師  
老莊氏總郊儀於冬祀時推顯相之勞高法從於夏卿  
日賴論思之益屢矣抗疏暫此分符行路爭睹於旌麾  
指日頓銷於桴鼓提封何幸人皆有於二天識面為榮  
侯何輕於萬戶況如么麼久願依歸唯夢想於儀形遽

親聞於罄歎道塗老矣每自歎於萍蓬墳廬在焉宜必  
恭於桑梓但念急頒於召節寧容久綰於郡章雖不忘  
重趼而來恐無幾承顏而去浮家泛宅尚時游茗雪之  
之濱曳履鳴珂想即侍巖廊之邃姑憑尺牘用告寸心

上孫參政啟

誕布明綸寵登碩輔真儒果用於魯國茂業可量大老  
既興於海濱輿情自定寰區共慶朝著生輝恭惟某官  
廉靖粹和高明久大絃歌壁水英詞蚤振於妙年領袖

蓬山嘉譽獨推於當世灼見前哲之大體蔚為三朝之  
舊臣自入奉於清光殆徧儀於要路盡言無隱直道不  
回持橐禁塗告嘉猷於我后分符會府下膏澤於斯民  
視草北門馳車朔漠眷極侍臣之列寵躋常伯之聯老  
成重於典刑久繫羣心之望器識先於文藝茲為全德  
之英比解帥藩趣還詞苑雍容帝所方䟽三接之榮密  
勿政扉即贊萬幾之重時逢多棘民未少休惟上聖臨  
御一紀于茲念中原隔絕千里而遠示菲食卑宮之儉

躬櫛風沐雨之勤肆覲羣方緝熙丕緒有君如此未寬  
側席之憂捨公其誰倚俟巨川之濟佇聞渙號榮正鼎  
司竊觀前古願治之君必藉名世盛德之佐事有定論  
人無間言相與扶明主於艱難之餘用能定大業於談  
笑之頃矧伊今日事半古人三戶亡秦乘民心之共憤  
五遷治亳幸天步之少安中夜以興寸陰可惜百里辟  
國時久思於召公十乘啟行人方歌於吉甫繼茲能事  
屬我宗公其蓬華門寒斗筲器淺空空何有妄希管豹



之窺兀兀徒勞未發醢雞之覆材迂踈而何用分連蹇  
而自甘客路飄蓬晚與門人之列清朝推轂誤蒙國士  
之知每慙馳問之踈欣覩除書之下屬訟愆於田野空  
懷想於門闌我冠文石之班想間盛事環堵松江之上  
獲庇寒蹤歲律崢嶸寒威凝沍仰念鈞衡之託益精寢  
餽之調

與方帥啟

分閭四川去國萬里曠日持久訖無成功終更亟還僅

免大戾泛江流之洶湧冒暑氣之裨延稍就夷塗甫寧  
悸魄皆餘光之所被非始望之敢期恭惟某官克壯其  
猷不顯亦世入儀禁路惓惓獻納之忠出鎮遐藩凜凜  
綏懷之畧其惟圖任乃允具瞻某夙荷心知久違音旨  
幸問津於治境將晉謁於元戎豈惟申悃悞之私庶或  
請誨言之益其為忻忭罔既敷陳

與夔路王帥啟

伏審奉承明詔鎮撫遐藩下車云初闔境胥慶恭惟某

官學優聖域望重儒宗直道而行曾靡居中之久為政  
以德復茲舉最之先所以無施不宜蓋其有本如是昔  
范公以給事而補外自番陽以待制而帥邊既步趨之  
適同亦名節之相似其惟圖任乃允具瞻某自顧拙疎  
夙蒙知照方幸同舟之濟遽勤賜教之臨向往之誠敷  
陳罔既

與晁帥啟

伏審欽承渙號全撫坤維郵音一傳輿論胥慶恭惟某

官宏才任重敏識造微舒翹揚英特達不依於繅藉批  
卻導窾從容皆中於宮商簡在淵衷進儀禁路謂遐邇  
之一體俾經營於四方緩帶輕裘已肅清於襄漢捫參  
歷井復深入於岷峨委寄益隆安危所繫少施餘力以  
訖外庸即膺圖任之求式副具瞻之望某承乏雖久曠  
瘼實多無以慰蜀父老之心何敢言楚令尹之政惟是  
辱知之有素今茲託契以為榮忻抃之誠敷陳罔既

與湖州王給事啟

上睠儒英中頒詔綽未遠長安之日帝眷方深來分刺  
史之天民情共慶凡茲闔境倚俟開藩矧惟么麼之蹤  
曾是知憐之素竊以据苔雪之會茲建侯邦自晉宋而  
來實稱道院有疊嶂重湖之清遠兼通都大邑之阜蕃  
華屋填城往往皆數百年之舊清香凝寢每每得二千  
石之良從昔名郊於今輔郡孰稱麾符之重寄政須簪  
橐之鉅公恭惟某官專靜鎮浮真清激濁表裏純潔炯  
中局之湛然內外踐更藹能聲之籍甚由布衣而著公

輔之望覽黃卷而晤聖賢之心夙擅英聲亟登華貫早  
正郎星之次繼躋卿月之班畫戟朱轡恩沾數郡高牙  
大纛威振十連遙歸再列於近班圖任益推於舊德盡  
言丹扆每傾嚮日之心批勅黃扉綽有回天之力謀猷  
有嘉則入告於內社稷苟利則知無不言宜政路之旋  
登亦與言之允屬少緩三槐之拜來為泗水之游抱遠  
業以徊翔擇樂郊而偃息浮家泛宅未營綠野之居五  
馬雙旌坐閱白蘋之勝尚虛丞相之席行趣舍人之裝

某寥落晚生蹉跎末路綴姓名於龍虎榜回首幾年望  
光儀於鵷鷺行承顏異日去仍墻歲月之久懷丈室朝  
夕於心顧馳問之浸踈喜揚旌之伊邇道塗悴矣祇自  
厭於萍蓬墳廬在焉獲致恭於桑梓當蔭萬間之廣厦  
自託一枝於深林幸會良多欣躍無已

與蘄州張倅啟

間乃其分久安巖壑之居用非所長遽奉麾符之寄粵  
有名士寔在同僚庶親議論之餘少追譴訶之及伏惟

某官飛英騰茂提要鉤元觀三代兩漢之書能守以約  
貫諸子百家之學每尊所聞蔚為江左之勝流早馳海  
內之雋譽搏風擊水寧淹溝瀆之尋常就日望雲合侍  
軒墀之咫尺況久隆於人望宜自結於主知夫長材  
之未施猶復餘及之小試歌謠戴路共高別乘之功譽  
望滿朝即慶鋒車之召遂膺時用益振家聲粉澤典章  
所賴燕公之力緣飾儒雅更傳京兆之風某本自疎庸  
加之遲暮適在長江之表偶叨一障之榮聞高誼之凜



然知危蹤之免矣徒索太倉之粟寧不知慙獲分節室之光敢以自賀指日即期於參候順時猶冀於保調

問訊左史兼中書舍人啓

跡踈龍坂尚飄梗於南州官在螭坳仍判花於西掖負隔升沉之若此缺聞興寢之何如長夏江村念繩樞之暫寓薰風殿閣想綸省之餘閒惟我醇儒膺時繁祉恭惟某官事業三代文章六經在韋布而憂天下之當憂由簡編而得古人之先得黃鍾大呂鏗鏘雅頌之音冰

壺王衡卓犖廟廊之具錐處囊者衆知其立見金滿贏者自耻於不如何意觸舟幾成按劍向非親擢於當宁誰令獨冠於在廷公議交歸高名愈白知君子所養矣彌堅金石之心見聖人而師之自契風雲之會踐方丈蓬萊之勝為玉堂金馬之儲凡國人皆曰賢無廷臣出其右以淵源澄深為諸儒之倡而辯裁清婉兼二史之長順風疾呼聲遠馳於四表急流勇退章屢丐於一麾衆皆祝公長無去國蓋雅富經綸之畧非但高黼黻之

辭面對燕閒偉辰猷之備奏心嘉鯁亮仰日鑒之昭垂  
粵自望郎進登法從特達顯印之眷雍容供奉之班有  
舉必書不愧春秋之筆削入告於內更資朝夕之論思  
常揚遠避其詞鋒班馬寧誇於史筆獨當上意高映朝  
紳直奏於前斷斷皆當時之務退言於後悻悻異鄙夫  
之為居多陳時政之書否則薦人才之疏主盟斯道推  
轂寒生堯舜孔周之所傳殆重興於今日富韓歐范之  
已往能繼美於此風伏念某生而戇愚飽於憂患近臣

論薦蚤賜覲於雲天仇家謗傷久投閒於草野叨榮華  
袞空老青衫忍圭玷之未磨尚玉音之可想然而未嘗  
得祿妻孥不知其有官耻於訴窮親交自憐其乏食已  
甘心於末路時矯首於崇墉似聞垂盡之孤蹤每指噓  
枯之餘論伋墻去久不以遐遺尺牘來疎知其病悴殊  
獎大踰於素願餘輝頓耀於窮途已玷齒牙更紆心腹  
疎庸自分非敢執求富之鞭羈栖無堪聊欲擊為貧之  
柝恩能及此念豈有他溝壑之辱有年儻終薦墨廟堂

之登不日重入化鈞盡室號寒蓋無廢屨之在矣叩問  
觸熱寧無襁褓之譏乎

問候太守啟

上睠名藩增慎麾符之寄中頒寵數聿咨簪橐之英想  
閭里望公之來庶江山因人而重某官道德純備詩書  
淹該窮游夏之淵源擅卿雲之黼黻由仁義而非行仁  
義獨明往聖之心知春秋而罪以春秋自信平生之學  
蜚聲雖泮結眷冕旒烏府絕姦嗣鄉評于子隱螭坳記

動推史筆於周任旋歸侍於家庭繼起臨於屏翰解印  
十年之久尚傳五袴之謠掩關一壑之幽自繫垂紳之  
望蓋難而後獲斯謂仁矣惟磨而不磷不曰堅乎茲由  
禁塗還紆郡紆暫辭近侍論思之列已無千里愁歎之  
聲皂蓋朱轡頓改吏民之觀袞衣赤舄矜期公輔之登  
其歷蚤歲以承顏越衆人而蒙遇一經白首蠹書可慙  
二紀青衫索米何補荷異恩之起廢復大府之充員容  
夢頓驚深自憐於匏繫歲華存易悅莫記於瓜期言當

問塗欣遂承庇恃有白日青天之鑒庶無震風凌雨之虞得二千石之良與闔境共霑於輝潤較三十里之智顧晚生曷贊於聰明某敢不恪以居官誠於事長間以獄訟簿書之暇求聞忠信文行之規風日清和尚寢興之加慎山川修阻諒跋履之為勞

問候平江守啟

二天獨有頃蒙潤於繡衣一水相望茲聞名於畫戟歲當再閏春有餘寒諒惟起處之宜茂對休祥之集恭惟

某官盛時麟鳳慶閥芝蘭襲家風太末之餘分詩律  
江西之派量凝千頃撓不濁而澄不清聲徹九臯發乎  
邇而見乎遠早埋輪於當道旋持橐於禁塗古循吏何  
以加狐狸安問大丈夫此之謂燕雀焉知宜登喉舌之  
司暫寄股肱之郡凡茲提封之千里共記持節之他時  
過漢于張民尚懷於仁恕維周申甫上允賴於蕃宣况  
茲要衝雅稱都會惟南北朝之交好方絡繹於使旌念  
東西府之猶虛宜雍容於政路會須贊國行矣告廷某



飄梗浮生負薪多病追往昔之咎顧面壁以何言為知  
已之羞豈登門之敢望無復自通於簡牘迺聞曲借於  
齒牙喜極春糧憂寬索飯願承顏於暇日及贊喜於新  
春詔演絲綸踵漢室三公之拜榜登龍虎掩徐卿二子  
之歌順風而前指期可賀

回謝及第人啟

妙中儒科榮登仕版公論所屬亨塗可量伏惟慶慰某  
人梗楠大厦之材圭璋清廟之器警悟不勞於師授該

洽仍得之家傳果以妙齡膺茲遴選不在君門之第一  
尚鬱衆評久知國士之無雙佇觀遠業為掾聊追於三  
語寤主即聞於片言自惟萍梗之蹤偶玷葭莩之末方  
深贊喜遽辱惠音粲然追作者之風為之興嘆謙以敘  
門生之禮豈所宜蒙但增篋笥之光莫效瓊琚之報

回第二人啟

謝策楓宸登名桂籍妙中亞魁之選共欽稽古之榮伏  
以某官天地鍾和山川毓秀淳厚爾雅文章追三代之

餘直諒多聞聲譽冠諸儒之右卓然遠器偉以高材較  
藝省闈已擅巍峩之第獻言丹陛益攄悃悞之忠力陳  
孝弟之言深贊治安之策搢紳動色共慶邦家之得賢  
師友聯名益見鄉閭之盛事某偶茲代匱竊預榮觀過  
辱長賤益欽雅眷愧乏瓊瑤之報但增篋笥之光

回交代蘇計議啟

錫命天墀觀風湖嶠仰惟澄清之素問豈及於狐狸俯  
矜沙汰之餘後無忘於瓦石粲然翰墨賁此衡茅伏惟

某官文成一家學該百代襲祖風父風而芳芬如在問  
今事古事而酬應若流密畫與聞早贊樞衡之議要途  
直上宜參禁橐之華淹汨幾時嘆嗟萬口季子佩相國  
之印終振家聲孺文登刺史之車鬱隆人望尚遙魏闕  
暫託湘流往賡衡嶽之篇聊窮偉觀歸奉宣室之對寧  
久遐方但念隔一夕之秋風還復共千里之明月某自  
惟艷繫空數瓜時撫陋質以無堪知英游之莫繼捫心  
自矢阻諧附驥之榮循分端安獲免續貂之媿仰銜雅

眷彌勵高風書札踵門珠璣盈軸遠勤一介行李之至  
賢於十部從事之臨惟子文喜愠有常未遽絕於新令  
尹顧李廣數竒可笑敢自比於今將軍固知圖報之宜  
深謝撫謙之過

回蘄州教授啟

孤飛未高每自嗟於六翮屢薦不入乃遽竊於一麾不  
遑招義而辭獨有親仁之幸惟某官珪璋清廟之器榘  
桷大厦之材邈游夏之淵源學窮聖域榮卿雲之黼黻

文掞天庭以終賈之妙年擅蘇張之大手鴈序共題於  
鴈塔久歆艷於鄉閭鳳閣聳聽於鳳鳴尚徊翔於邵國  
思樂茲游於泮水選掄即上於瀛州某撫隻影以何堪  
荷雙緘之見予久隔異縣行遂同寮飽聞蕲水之濱最  
號芹宮之盛游鄭僑之鄉校行聽弦誦之音即何武之  
學宮尚賴箴規之益成我素志所望故人

與教授啟

青山白水之盟歸歟未遂皂蓋朱轡之寵老矣何堪重

拜佳音仰欽雅眷伏惟某官器資凝重學術邃深兄弟並列於儒科已掩機雲之譽家世共推於賢業有光羣紀之傳了無俗吏之簿書合上諸公之臺省斯文振起多士鼎來某屏跡為深離羣茲久故人有幾當復見於儀刑餘習未除尚樂聞於弦誦庶以餘暇獲奉緒言

回江陰薛知軍謝到任啟

榮膺朝命出領郡符采吉日而見吏民揚仁風而布條教里都共慶黨友增輝恭惟某官才秀儒林望隆時輩

蚤以賢關之彥常登冊府之游踐履為多尚未冠金馬  
玉堂之選聲猷益大當始於朱轡皂蓋之時視事云初  
辱書甚腆荷撫謙之已至慙伏謁之未遑諒無久淹即  
躋要近鳴玉曳履將入踐於華塗賣劍買牛宜速酬於  
雅志仰懷風味良切瞻依



欽定四庫全書

浮山集卷九

宋 仲并 撰

啓

代執政謝賀新除啓

視草玉堂頻上乞身之請疏恩丹陛更叨共政之圖寵  
至若驚令行弗反念遠猷之何有辱高義之相先疾讀  
誨音交流慙汗某官風華懋美天韻雄成持自得之學  
而尊其所聞蘊至剛之氣而養之無害長篇大軸方天

下想聞其風直道危言顧廷臣無出其右宜居四近協  
贊萬幾乃紬金匱之藏暫奉琳宮之逸更春秋之一字  
誰敢異辭得謨典之百篇復見左史遠勤華翰俯賁衰  
蹤燦然錦繡之詞恍若瓊瑤之貺某離羣滋久被命過  
優嗟小器之易盈何能稱此惜真儒之未用益愧先之  
祈茂毓於粹和尚阻陪於談笑

代賀漕除戶侍啓

詔頒天陞恩陟地官聳風采於列城籍甚埋輪之譽增

羽儀於禁路偉茲持橐之班簪紱均歡冕旒虛竚竊以  
會計自有綱目廢之斯紊而舉之則張泉貨非無源流  
疏之斯通而壅之則止仰惟累聖具有成規凡斂散出  
納之權為經常永久之計餘財餘力民無一日之徭足  
食足兵國有九年之蓄閱歲茲久遭時多虞官簿紛紜  
弊起胥徒之手民田連亘富擬王公之家舉世咨嗟賴  
公灼見銷百年之患不勞指顧之間為兩路之民永息  
追呼之擾法當推廣眷益優隆恭惟某官道極高明氣

充剛大洽聞博物學貫百氏之書發策決科文高乙夜  
之覽以潔淨精微之教逢聰明睿智之君墨綬他時屈  
宏才於下邑繡衣三歲騰歡頌於載塗任衆人所難能  
合斯民之共願兩手加額萬口同詞侯宅侯田旣力推  
於豪右我疆我理庶永斷於侵漁萃此殊功滋膺妙簡  
仁政必自於經界已悉正於版圖老成實重於典刑宜  
遂聯於簪橐卓爾羣工之標的茲為二府之權輿成命  
初傳有識相慶某猥蒙知遇浸荷使令奉令而行惟謹

遵於三尺指心自誓儻圖報於萬分賀厦為深趨庭未  
遂莫勝敷叙但劇欣榮

代人賀陽奉使啓

登持禁索就擁使旌聽履而上星辰聳儀型於百辟出  
疆而安社稷敦和好於兩朝維時鉅公實允羣議某官  
喬山松栢層漢鵷鴻威儀詞令之不凡出處行藏之可  
紀推諤諤之一士名早播於簪纓萃師師之百僚眷獨  
深於黼黻周爰使節共理侯藩盤根錯節之無難視草

判花之已晚輦轂先彈壓共高京邑之深原隰有光華  
茲重使輶之遣暫閱大司農之印徑躋少常伯之聯極  
寵耀於一行視恩輝於八座自天子所揚萬里之威名  
真丈夫哉快一時之觀聽某塞薄門闌之下客飄零江  
海之餘生雖長此阻陪於後塵喜行矣將歸於大冶神  
其持護可忘道路之勞帝曰邁歸即正鈞衡之拜

代考功郎中謝宰執啓

不習為吏猥充數於侯方何自為郎遽升華於省戶目

眩雲天之遽身參鸛鷺之行踰分疏榮省躬知懼伏念  
某愚未聞道懦無取材斗筭之器小哉寧知遠者大者  
箕裘之業衰矣敢云有之似之徒以早唯詩禮之聞不  
忍少廢簡編之習候槐黃於八月屢戰無功望桂魄於  
九霄自憐不遇乃抗塵而走俗每勞形而苦心艱險備  
嘗交游益落頃預登聞之末屬初觀文物於本朝魏闕  
馳心幸不違於咫尺太倉索米曾何補於分毫無何薪  
桂之不供非為尊鱸而欲去懇求補外偶玷治中望行

都數舍之遙幸賢牧接踵而至蒙成自慶敢希南陽太守之稱揀過不遑寧有海沂別駕之譽從容茂苑長洲之勝談笑清香兵衛之間念百里之行至九十而方半顧千鈞之重豈一縷之能勝忽驚詔綽之頒遽竊守符之寄幼之所學於古者將行其志前之所任其長者今推而行每一事必稽於公言寧此身專任於衆怨不意譴訶之粗免每虞謗譴之交興迨此終更還叨初渥解印章者幾日聞警蹕於大昕三年可使足民僅逃於戾



一言何能寤主宜黜而升謂稍還中都官之舊班乃徑處尚書郎之高選矧伊考績幾類典銓自昔相傳兼司貢士之選舉于今未替仍掌勲臣之謚章七司之案牘旁通百官之考課具在材宜克稱事最為繁曾微累日之勞驟玷列星之次此蓋伏遇某官甄陶萬彙橐籥一元負剛毅敢為之氣而守以至謙積深造自得之學而持之無倦黃鍾大呂鏗鏘雅頌之音北斗泰山烜赫台階之望持危扶顛而力有餘裕守文應變而施無不宜

雖斯須告后之言皆悠久經邦之略輔贊彌縫而藏諸  
用光輔丕圖又負偃植各安所施並徠衆俊坐令孱瑣  
亦復超踰某敢不策疲曳以忘勞履靖共而安位勉揚  
乃職思稱所蒙方太上皇開近侍薦舉之科已首竊朱  
轡之寵惟今天子下內外更番之令又躡陪畫省之遊  
自揣何人每叨殊獎銘茲厚植誓不辜恩感懼交懷言  
書莫盡

代鎮江守謝宰執啓

釋宣流之重寄僅免譴訶分近甸之名藩益慙倖冒人  
欣由遠而及邇自慚已去而復來獲安萍梗之蹤盡出  
鈞陶之賜伏念某性資頑鄙材具拙疎隨地而安謂遇  
坎乘流在我而已為貧而仕乃抗塵走俗垂老不休費  
歲月於奔馳耗精神於憂患力小不可任大而委任多  
過其材命薄難與成功故事功略無可紀徒積素餐之  
愧不知華髮之侵所願終焉蓬蓽之間況亦晚矣桑榆  
之景屬者烽塵之擾蕭然淝水之濱荷君公起廢之恩

豈臣子辭難之日扶老攜幼於風塵之際黽勉畏塗救  
死扶傷於煨燼之餘侵尋累月竟無毫髮可效涓埃旋  
易朱方席未遑煖遽貽白簡罪不勝誅益收驚魄於故  
廬長保殘軀於暮景荷清朝之簡記趨便殿以對揚誤  
膺鄂渚之除亟遡長江而上赤壁夏口視形勝之具存  
京口曲阿豈夢魂之敢到忽聞申命獲拜制書此蓋伏  
遇某官文章六經事業三代聳北斗泰山之望播黃鍾  
大呂之音柱石本朝輔贊彌縫藏諸用權衡多士又負

偃植安所施籌策無遺勲名有耀犯顏軒陛判羣議於  
一言正色廟堂裁萬幾於反掌方並來於衆俊曾不棄  
於寒生爰因新掛印而東復畀舊分符之地某敢不撫  
摩彫瘵振起懦偷今日所當言者朝夕而行曩昔所未  
至者一二而改人臣均於愛主願分宵旰之憂郡守職  
在養民尤在水潦之歲誓殫駕力仰答鴻私

代人宮祠謝宰執啓

病餘待盡寄暮景於山林望外叨恩奉真祠之香火仰

銜鈞造深激懦衷伏念某用意迂迴觸向乖迕辛勤早  
歲所服膺者前哲丁寧之言捐介一生所切齒者流俗  
靡敝之習誓無忘於日用斷自保於歲寒頃省戶初造  
於坐隅每暇日備陳於心曲照其惓惓契若平生至於  
極力保持脫危蹤於虎口加之過情推挽陪法從於螭  
坳稍親天日之光尚畏風波之迫乞郡符而引去猶書  
殿之疏榮周旋其私始終若此契濶仞墻之寢久因循  
尺牘之遂疎豈炯炯之有他謂區區之何益知心最舊

固宜竒禮之兩忘薦語尚新豈慮流言之三至逮更除  
於兩郡旋趨覲於九霄還載筆之舊班恩寧無自僅持  
橐之滿歲罪在不容沸騰白簡之辭罷免丹卹之守坐  
此七年之屏跡蕭然萬事之冥心已玷恩門終棲德宇  
初謂生存之無望亦知顛沛之可期流離敢望於他人  
顧盼未忘於疇昔尚頒稍瘳力護瑕疵憔悴餘年終賴  
賞音之素紛紜行路虛疑獲譴之深恭惟某官燮和一  
元陶冶萬類輔贊彌縫藏諸用上表精忠勞來還定安

其居民臻寧壹蠲除密網振起頽波如殘生委頓之餘  
更衆毀摧傷之久臥疴農畝恃大庇而少安賦祿祠庭  
揣素餐而益懼惟堅持於晚節亦深訟於昨非敢曰酬  
知終焉戀德瞑目何望分作天地之棄人沒齒為期長  
借江河之餘潤

代平江守落職除宮祠謝宰執啓

悔尤自見疵豈待於吹毛彈劾遽聞罪莫勝於擢髮俯  
從寬典仰戴殊私咎雖由於一飲一食之間恩不忘於



三沐三熏之素伏念某凡材樸樛薄命崎嶇屢試無聞  
將行復躋嘉肴不知其旨學豈足以探微葷食不堪其  
憂恩誤蒙於起廢粵自茗溪之偏郡更擢茂苑之要藩  
內省冒居久思引去屬使擅之修好頒燕豆以示慈方  
遠人欽奉於王靈豈一介驟干於國典凡酒醴牲醑之  
設悉有遵承雖供張器用之微靡容加損誰為草具以  
紊初筵壞館納車僅免有詞於鄭國烝散薦體不憂興  
問於晉人雖謂至愚寧忘自力遽煩剗削深負陶鎔尚

竊食於外祠姑罷直於中祕保全曲折感懼再三某官  
柱石本朝權衡多士彌縫補贊既臻於治偃植又負悉  
用所長謂斐然不知所裁罪則有素而過也各於其黨  
心實無他如憐艱晚之蹤更厚帡幪之庇念平時細謹  
不敢越俎而代庖顧書生酸寒難使監厨而命定以儆  
不肅聊示有懲某敢不祇荷寬恩因追往咎作餅空勞  
於畫地自歎迂疎懲羹不忘於吹鑊彌思戒慎

代湖倅謝宰執啓

聚族猥多不能供億逢辰旣泰耻獨飄零恩誤出於鈞  
陶憂頓寬於溝壑飲食必祝造化難酬伏念某材具非  
長器資甚淺粉榆旣隔銷歲月於奔馳蒲柳易殘耗精  
神於憂患棲遲無地孤露不天敢懷結綬以登畿但願  
攝齊而請業在後固宜於瓦礫分也奚言居貧莫具於  
簞瓢蕭然已甚頃持危惻仰叩崇墉謂或死或生之分  
繫吾相一笑一頓之頃方旅退旅進之次蒙我公三熏  
三沐之私願旣滿於登門寵更叨於佐郡方茲需次已

復問塗惟四水之侯藩號二浙之道院白蘋繞郭華屋  
填城明月清風既宛存於舊觀浮家泛宅尚追想於遺  
蹤良慰途窮曷分吏責號寒啼飢二十口均欲酬一飯  
之恩摩頂放踵六尺軀邈未有纖毫之補恭惟某官力  
扶宗社心契乾坤宇宙山河盡回和氣禽魚草木亦賴  
恩輝冕旒獨倚於精忠竹帛疊書於茂烈羣才並進偃  
植各安所施異意潛消艾夷勿使能殖贊贊祖宗萬世  
之業疊疊唐虞三代之風鑒此孤蹤斷無他技有加憐

惻弗忍流離家室妻孥驩然相告父母天地恩其可忘  
某敢不圖効萬分謹遵三尺駑駘十駕所願勉旃鷦鷯  
一枝不啻足矣心焉懷德誓不辱知

代郡守謝侍從啓

臥漳濱之疾亟返鄉枌復鴈門之跼重紆郡紱恍若沉  
疴之去體猶念覆車之在前備歷多艱若為共理伏念  
某瓶罌之器易滿而傾拱把之材過用則折久矣坐叨  
於餼廩蔑然無補於事功數免稀遷榮未施於毫髮早

衰多病憂每迫於膏肓惟聖主親攬於權綱而羣材悉  
起於幽遠有如孱瑣示預使令攬轡登車已負埋輪之  
譽捫參歷井敢忘叱馭而前乃呻吟於路旁分沉寔於  
死所自天而下忽霑從欲之恩順流而東始有更生之  
望白骨幾再肉矣死灰寧復然乎方欣一壑之專寧復  
三刀之夢忽茲假寵無路懇辭念材具之非長復憂愁  
之不貸吹鑿懲涕自念傷弓之餘滴淚到泉更嬰舐犢  
之戚神明未還於舊觀道德益負於初心雖已懷印紱

而來猶欲掛衣冠而去甫茲視事惟懼瘵官恭惟某官  
一代老成斯民先覺以正元之朝士首甘泉之侍臣特  
立卓然屹中流之砥柱孤光炯若粲明月於長庚當宁  
已熟於履聲造膝每懷於諫草行膺制綽入秉機衡俯  
念窮途久沾餘潤謂異時試郡雖慙二千石之良而平  
昔登門不啻三十年之舊假此朱轡之寵本由華袞之  
褒某敢不體息黥補劓之殊恩圖宣化承流之薄效悉  
蠲民瘼仰答已知事君以人已誤勤於推轂代天理物

惟側聽於演綸

代謝監司舉薦啓

賜閒丹陛自媿叨踰承乏泮宮敢求聞達豈謂剡章之  
寵得於擁篲之初竊以當宁思賢方以得人為急羣工  
體國率懷舉類之心然而斯人或老於山林沒世不聞  
於朝野况彼深情而厚貌鑒裁為難類皆飾偽而亂真  
沿襲滋甚輕儇狂斐者以警慧而獲舉循默遲鈍者謂  
純雅而見收或肆為放蕩之言至自詭經綸之略世更



相笑人不易知如某者術業空空性資下下挾書早歲  
嘗妄求六藝之歸筮仕壯年了不通當時之務自登名  
於科第久待次於田閭粵在去秋遽聞召命引道即趨  
於魏闕俯躬入覲於楓宸揣愚分以遄歸迫官期而來  
上竊五斗之粟遂寬菽水之憂蒙一字之褒更重駑駘  
之價此蓋伏遇某官主盟斯道推轂寒生嘉善而矜不  
能允矣大賢之度好德則錫之福念茲皇極之言顧如  
孱愚允謂䟽邈親承輝庇方託二天之仁首示薦章更

妙五雲之體莫勝榮幸姑誓緘藏某敢不祇畏簡書服  
勤夙夜益勵疎愚之守用報所知回觀清要之塗良非  
所望然而儒宮牢落士氣彫零廊廡僅存詩書絃誦之  
久廢廟宇不設簠簋豆之俱亡寓奠獻於釋梵之宮  
設筵几於茅茨之下凡在使麾之所部為郡幾何闕然  
鄉校之不修惟此而已尚靳特達曲示恩輝豈敢遽望  
於落成庶幾稍資其經始當與多士共荷深知過此以  
還未知所措

代李司理啓

立笠澤之簿書方虞曠戾移蘇臺之獄訟更辱超升曾  
未朞年獲書再考深惟倖冒彌積悚惶伏念某本以諸  
生獲陪多士粵從弱冠即玷賢書周旋詩禮之異聞粗  
知嚮道佩服聖賢之遺訓用以成身志竊慕於古人文  
敢希於作者誓堅素守絕意亨塗逮晚困於流離繼頻  
更於憂患衰遲已甚窮困焉依乃稍緝於舊聞遂復賈  
於餘勇擔簦鼓篋於羣英之後爭名較藝於寸晷之餘

笑末學之未工悼初心之已負偶緣薄技遂奉儒科昨  
從筮仕之初即處提封之下一行作吏安知巧宦之機  
半世倦遊常在數奇之域甘沉迷於簿領已自斷於平  
生既才疎與世以多違又動輒迷方而不遇方懷退縮  
敢意甄收誤蒙特達之知更處平反之寄空坐縻於歲  
月終何補於事功每懷朝夕之憂更甚簡書之畏自分  
書下下之考其敢希赫赫之名賴盛德之包荒俾終年  
而尸素此蓋伏遇某官斯民先覺吾道主盟忠嘉久簡

於上心議論獨傾於諸老徧儀禁路嘉猷未究於所長  
出領輔藩坐嘯何勞於游必將益茂經邦之業故每敦  
推轂之風致此寒微首蒙賄賂疎庸何取敢云州縣之  
徒勞頑礦無堪尚冀鈞陶之在後某敢不益堅晚節慎  
守官箴思少効於纖毫庶仰期於知遇

代人贄見婺守啓

垂大名於宇宙雅願登門走賤役於塵埃適諧望履跡  
自憐於么麼庇永託於幘幪幸豈人謀思惟己獨伏念

某簞瓢貧餓萍梗飄流少也從師供洒掃應對之職長而試藝乏雕蟲篆刻之資決戰徒勤策勲何有蹭蹬場屋莫廁千佛之名惆悵雲霄欲致諸天之問此心何在  
一飽所驅未容辭簪楚而脫薄尉之中寧有持旌麾而出幕府之望竭來涇水祇役窮山去門牆跬步而遙日  
蒙暉潤環閭里千家之聚歲幸豐穰藹然絃歌溢於達路踰年坐糜於餽廩終朝絕簡於簿書父老均歡非止  
干戈之不識官寮自幸更省桴鼓之稀鳴自愧空餐祇

虞深譴賴密依於蓮幕每快覩於芝眉謂閱四十而無  
聞雖賦資之極陋念陪三千而受業亦用志之良勤假  
以色辭慰此勞悴罰不勝而誅不至以是為憂閔其勞  
而序其情恃公為重雖阻陪於杖屨已深蒙於肺肝恩  
實知歸報將何所抱關擊柝自念有時而為貧毀瓦畫  
墁大類無功而得食疎庸安取僥倖何多恭惟某官名  
擅斗南氣鍾江左見聞該洽滿詩書於腹中詞藻淵源  
揮雲烟於筆下躬行孝悌氣蘊中和攻曉寗夜燭之勤

以春誦夏絃為樂箕裘世業合視草於玉堂羽翼聖經  
每擷英於黃卷令譽藹聞於中外清風稱冠於古今丹  
桂一枝凜諸儒之莫望靈芝三秀偕羣從以同登既鴈  
塔之書名宜鳳池之接武北門西掖行司帝制之嚴疊  
嶂雙溪暫借侯藩之重已看煖席行即賜環重念某棲  
遲末路之有年擺脫窮愁之無日已踰壯齒蒲柳之質  
易衰久困窮簷樗櫟之材何用徒分陰之是惜競寸晷  
之無從仁不遐遺已荷包荒之度善惟類舉尚希拔茹



之私

代宋帥回張魁啓

射策天庭登名仕版榮中君門之第一素推國士之無  
雙公議所歸輿情共慶伏以某官力行仁義允蹈中庸  
觀三代兩漢之書而尊其所聞覽諸子百家之言而守  
之以約學深自得性稟不羣以道術支離為心憂獨得  
伊川之正統以天下安危為己任歷陳涑水之嘉謨摧  
冠省闈已騰令望比奉大對益獻忠言誠意格物而採

聖賢之心已著當年烜赫之譽誦詩讀書而為國家之用可見他時康濟之功某猥以疎庸之資誤忝承宣之寄仰慶朝廷興賢之盛幸觀閭里得士之榮薄植何功長牋誤辱愧乏瓊瑶之報但增篋笥之華

欽定四庫全書

浮山集卷十

宋 仲并 撰

雜著

祈雨文

禾棲南畝竝期倉庾之登雲密西郊盍慰田廬之望演  
秘言於琅笈輸誠意於璿穹念此吳人力於農事寧婦  
子而盈百室所望有秋先公田而後我私尚資一雨伏  
願興油雲於反掌霈膏澤於崇朝潛消螟螣之災畢刈

茨梁之稼仰祈天鑒曲徇民言

謝雨文

周雅之歌有年方切農夫之望魯史之書不雨實為守  
土之憂敢先事而致祈乃指期而獲應油雲晝合膏澤  
夜零慰我民心孰非神力邇遐共慶已卜千倉之稻梁  
稚耄相呼預圖九月之場圃尚終此惠然相其成

祈晴文

三農畢務萬寶告成天既錫之豐年人方仰以辛歲遽

淹常雨尚稽倉廩之登少豁陰雲庶慰郊原之望佛慈  
甚邇民力可哀俯竭忱誠仰祈鑒佑保嘉穀於垂成之  
際在覺力固非甚難困斯民於多難之餘宜天心有所  
不忍

又

占星授時農事初勤於東作力田望歲民力共效於春  
祈念此積陰殆踰旬浹農末皆病閭里大嗟舊雨復今  
雨而相仍元日至人日而未已虔趨梵宇祇叩覺乘冀

慧照之普臨擴洪慈於垂佑頓消氛翳旋睹清明歸行  
潦於百川既升景日歌大田之多稼共樂豐年

又

萬寶得秋已卜倉箱之慶三農望歲矜看場圃之登于  
彼郊原奄觀銍艾大田在望苦雨奈何冀惠日之照臨  
豁重陰於指顧時止則止曰暘而暘瞻霽日於東隅民  
應相賀起多稼於南畝歲以無憂

又

寶稼盈疇方切秋登之望水輪離畢遽為夏耨之妨積  
雨奈何提封告病隔四山於煙靄之外掩干塍於雲水  
之間仰叩覺乘虔趨梵宇時止則止曰暘而暘庶資藉  
於神休用慰滿於人欲披雲共慶收行潦於崇朝擊壤  
同歌占大田之有歲

又

斗覆歲穰雖莫窺於洪造角見雨畢亦終賴於殊休爐  
熏徹而帝意孚梵唄聞而神釐格旋覩雲陰之解駁頓

瞻天宇之清明且舞且歌是獲是刈惟甫田之在望迄  
用康年豈覺力之敢忘有如皦日

又

寶稼盈疇方切秋登之望永輪離畢遽為夏耨之妨茲  
煙靄之畫騰已峯雲之夕斂憂寬守土喜浹提封尚念  
有秋曾無幾日冀覺慈之終惠訖陰相之前功萬物之  
生得宜方逢盛旦五者之來以叙庶格豐年

代平江守勸農文



阡陌連亘土壤膏腴歷觀數郡之間未有此邦之盛雨  
暘時若禾黍歲登今即郊垌仰遵詔旨田疇在望父老  
具來非曰務為美觀蓋將求乃實效天時地利要須人  
力相扶春耕夏耘然後秋成可望其躬率於子弟亦轉  
語於比鄰仲春事于西疇茲惟時矣平旦坐於左塾相  
與勉之勿辭風塵雨露之勞各為父母妻兒之計當分  
陰之是惜庶數口之無飢其或惰農有罰勿悔

田孟郡王姻禮書

五世並於正卿無假龜人之卜一女不與凡子自憐處  
士之心敢謂宗工不遺衰系甫遂絲蘿之託洵頒箱匪  
之豐合好千秋納成今日顧憔悴何以稱此况顛愚僅  
若而人職替公宮慙匪有齊之季女先生蹶里佇看迎  
止之韓侯仰望終身欣榮之至

荅孟郡王姻事報日書

伏承卜茲柔日賁以華賤至于再至于三方懼猥辭之  
瀆迨其今迨其吉欣惟嘉命之承

為五弟問姻王氏書

必恭桑梓孰先父母之邦薄采蘋蘩莫重春秋之事茲  
圖合姓仰恃通家某第五男顓蒙何取於鄉評伏承令  
女二小娘子婉婉無忘於姆訓豈韋布敢求夫佳偶顧  
萍蓬久藉於餘光風土異宜無若鄉閭之舊著龜協吉  
遂忘門戶之微庶幸俯從益敦永好

為妹回蔡氏姻定書

蟬聯華胄世久襲於金貂萍泛寒蹤身粗安於蓬華敢

圖姻好偶契夤緣某第幾女子姆訓無忘第習勞於機  
杼伏承令似從事家聲是繼寢騰譽於簪纓聞命行媒  
增輝節屋遂松蘿千秋之託願拜嘉音盛羔鴈五兩之  
儀益欽雅眷有少回禮具列別牋

子舍姻定書

漢列留侯久聲猷之未墜周歌山甫今苗裔之遽微安  
議姻聯敢忘族系易簡愚弱未冠唯翰墨之服勤伏承  
某人婉孌方笄早閨闈之毓秀敢徵福於先世用納吉

於華宗五世正卿信媯姜之協吉一鄉兩姓庶朱陳之  
復生豈無他人其惟大援

代為外孫女孟氏作姻事言定李仲簡書

白也之思飄然久馳雋望三桓之孫微矣猥辱佳音龜  
筮協從室家相慶某人女功是習婦禮何知伏承某人  
譽著虞庠名優漢殿荷一介行李之至得五世正卿之  
家愧我好述偉茲吉士春風得意云初僊桂之攀末系  
生輝永遂女蘿之託

代王氏姻禮書

初求大援非吾偶之為慙適兆和鳴豈人謀之及此乃  
以衰系獲締華宗古所重者繼世承祧頃既陳於問名  
納吉占期伊邇候已覲於三星納幣有稽儀敢望於五  
兩

代人姻事定書

婚姻劉范求平時臭味之同閱閱崔廬孰若我鄉閭之  
舊敢徵福於先世用增耀於衰宗某人子職之餘粗習

前人之詩禮伏承令女姆訓有自不忘女史之箴規頃  
問名於行媒許合好於二姓一溪共住匪宋遠跂予望  
之盡室均歡忘齊大非吾偶也有少禮物具如別牋

代石仲澤姻事定書

正婚姻而辨姓將繼嗣於前人申媒妁以問名宜率循  
於古訓某第幾男某年齡鼎富伉儷求諧適茲筮仕之  
初思得承家之助伏承令女溫恭而孝柔靜以和雍容  
環佩之儀窈窕閑闈之秀拂龜考吉協鏘鏘鳴鳳之符

占星問期正灼灼桃華之候相我宗事無易淑姬矧三  
遷方藉於鄰光而九里獲霑於餘潤荷親情之有素宜  
姻好之相求結援高門儻遂絲蘿之託來宜私室載賡  
蘋藻之詩百金何言一諾為望

